

養廬詩文稿

李頌韓先生遺著

弟子陳

柱敬題



李君頌韓傳

嗚呼余與頌韓交垂四十年憶昔光緒庚寅之歲余自京下第歸省郁氏外舅於新塘市與內兄擗芳奕頌韓排闥入笑曰吾聞棋聲知唐先生至矣手出一帙呈余則會課卷也余閱其文倜儻有浩氣亟賞之拔前茅頌韓遂來受業少余才七歲相依若昆季乃今歲五月聞頌韓病纏綿弗能起余甚憂之而頌韓竟以九月一日死矣赴至之日余適病家人匿不以聞越七日頌韓子家俊以書來乞傳余大駭涕霑襟嗚呼余何忍傳頌韓邪然如頌韓之好學篤志品詣潔白則又烏可以無言按君姓李氏諱聯珪頌韓其字江蘇鎮洋人考諱昌謨字遠甫贈中憲大夫妣土氏贈恭人余嘗先後爲表墓作傳以顯微而闡幽者也頌韓性至孝生而孤每道其尊人事未嘗不唏噓流涕九歲王恭人卒哀毀不欲生嘗自述夜夢王恭人告以兒無苦官讀書自立大哭而醒其誠摯如此事兄聯璧和而敬處家庭及鄉里瑣細事必先意委婉諭於道年十九補博士弟子員旋食廩餼試輒冠其儕肄業江陰南菁書院先後受業於吾婁王先生紫翔定海黃先生元同之門聲譽甚著繼又受業於吾友吳縣曹君叔彥曹君大器之頌韓遂從事於三禮之學深有所得丁酉歲應北闈試寓余家朝夕攻苦先大夫與之論文不倦迨榜發不中第先大夫爲嗟歎者數日頌韓遂無意科舉納貲爲郎簽分法部主事余掌商部時調任商標局並佐崇文門稅務皆井然有條理時仍居余家暇則考德問業丙午歲余遭先妣胡太夫人之喪含殮之日余哭踊頌韓力抱余翼衛以成禮後家人告余始知之嗚呼此情此景甯堪復憶邪自後余出掌上海南洋公學頌韓亦翩然歸余遂聘爲國文科長相依者又十五年辛酉歲余歸錫山講學頌韓留滬校蹤跡稍疏然每歲必來

一二次訪余其道德文章吾見其進未見其止也性尤好善在新塘市辦育嬰堂奔走捐貲日益宏大疏濬東鄉河道監督工程櫛風沐雨無少懈於鄉邦文獻嘉言懿行注意闡揚甲子歲齊軍作難瀏河新塘各區婦女殉節者甚夥若張氏烈婦趙女鳳姑頌韓皆爲立碑作傳以樹坊表爲文宗韓歐上溯漢唐爲詩力追李杜教學子直而剛有踰越禮法者面斥之不稍假借嗚呼孰謂天不佑善人而儒林中不愍遺模範邪吾鄉文字之盛權輿於王弇州張天如兩先生迨陸陳二先生出崇尚躬行宗風益粹厥後鄉曲間若彭甘亭崔不珣諸先生亦能各擴專長別立一幟今頌韓所造雖不逮王張諸先進而其精神魄力較之彭崔殆有過之無不及當壬辰癸巳之間吾鄉風尚振興士務實學同志賢豪相率爲文酒之會頌韓每在座著發穎豎議論驚人一時名宿交相推重余亦以爲英才難得如頌韓者庶幾大用於世爲吾道光卽不然亦當從容論學紹述先儒矜式一鄉以揚名於後世庸詎知其遽止於此嗚呼世與人之不相侔也時與學之不相合也賢人君子之瓠落無聊不獲太平而壽考也所謂彼一時此一時者悠悠蒼天不可得而問也豈不大可哀哉雖然頌韓往矣而余反爲後死者紀其行誼俾不至於泯沒則頌韓其又奚悲至其平生所著不自收拾鮮有成書頌韓有子四人長家譽塲次家俊出爲兄聯璧後三家修四家齊余深望其克承先志編輯遺書以永令聞云友兄唐文治拜撰

養廬詩稿序

嗚呼此乾坤何等時耶八表同昏竟如長夜吾尙忍序先生之詩耶國變後丁卯秋始識君於申浦丙辰冬錢子履樛在浦濱起消寒會有滄社之作用岑嘉白雪歌韻而君詩先成一座傾倒未幾余旋里閉關韜晦君攜詩過訪或縱論時局輒歎息泣下甲子歲陸式翁在城北起甲子吟社遺老畢集君提創之力居多君富於才出入莊騷其高者不失爲李杜韓蘇而時露俠氣則君之特色君性落拓不自收拾晚又三遭兵劫什物飄零而此則爲劫火之餘蝸涎蚌粉塵有存者其可弗寶貴歟且君之詩非苟作也思搜羅文獻保存國粹爲吾鄉留一脈乃天奪之年抑獨何耶噫余忝長於君剛及十稔君棄我去他日收詩者更有何人興言及此淚隨筆竇云庚午六月同里斗航道人張宇序

李頌韓先生遺集序

李頌韓先生既辭世後之某年同門唐謀伯胡粹士諸兄謀梓其遺集命柱爲之序柱曰唯唯嗟乎柱其可以無言邪柱之粗解文字實自唐蔚芝先生與李頌韓先生始而柱之能以文字受知於唐先生又實自李先生始然則柱於李先生之遺集其可以無言邪雖然李先生之學行其犖犖大者已著於唐先生所爲之傳與序矣故弗述述其軼事先生性爽直見人之惡如鯁在喉不面斥之不快然往往雜以滑稽言過輒忘故主任南洋大學國文十餘年而學者咸翕然服之嘗記一日有學生以白筆在黑板寫字無何鐘鳴先生上堂學生不及避先生從容坐定點名畢起請某生曰此一課請君代某生大驚全堂皆愕然不知所爲先生徐指某生曰頃見君在黑板寫字固儼然一先生也全堂爲之肅然下課後某生懼甚以爲且受重懲久之竟無事又一日先生在堂講文有數學生徘徊窗外先生鞠躬請曰諸君好學甚善然在此立聽太苦請入課堂何如諸生爲之狼狽不堪不得已而從之其詼諧多類此同學傳爲美談受之者畏之而不敢怒聞之者樂道而知勉也唐先生長南洋大學時感清季士氣之不振嘗請先生督同學生之能文者編忠義傳先生發凡起例與諸生共晨夕風晨雪夜無少懈後值鼎革以事中止今譚介甫傅志章廖茂如孟憲承諸兄與柱皆嘗參與其事者也先生於文最好戰國策爲輯注多種然先生之學則甚醇柱嘗笑問先生曰戰國策小人之文也先生何好之篤乎先生笑曰蘇秦張儀吾取其法不取其心晚年復喜爲駢文求者甚衆然先生固不自重之嘗曰此俳優者之爲也不足傳先生爲文汪洋自喜詩學少陵晚遭喪亂所作多關家國盛衰之故足爲詩史先生體貌魁梧聲音洪大言堂滿堂言室滿

室嘗謂柱曰唐先生與吾二人皆狂者也唐先生能以學問涵養故粹然爲世大儒吾與君尙無涵養功然亦唯唐先生能容吾二人之狂耳唐先生與先生及柱皆豪於飲嘗同侍唐先生筵上把酒論文放聲高歌先生在同門中年最長酒酣以往言論尤滔滔不絕口如縣河聲如洪鐘同坐皆偉之不謂世變日亟先生竟以憤時疾俗忽捐館舍勿勿三年先生之聲音笑貌已不可得也不亦悲哉先生嘗言爲文不求世之知夫君子疾沒世而名不稱士生而至於不能得人之知其志已可悲矣乃至於能得人之知者而竟不欲人之知不亦更可悲哉然先生之遺詩遺文俱在今唐胡諸兄爲之刊布於世則先生雖不欲世之知而世已不能不知先生矣雖然世變益亟六經束高閣斯文將掃地世其果足以知先生否乎則又柱與唐胡諸兄所不能知者矣

中華民國二十年一月受業北流陳柱謹序於上海交通大學

養廬詩稿目錄

卷一五言古詩十四首

東沈知事希白 輓陸禮南表兄 謁白公講院 題畫丐丐畫記 阮籍嘯臺 題賈島除夕祭詩圖
嬰堂作蘇軍司令部乳母散去三孩死存感作 衣垢待泔內人爲製新裳悵然有作 觀岳鎮耶穌
教堂施粥 岳鎮南廟設廠施粥誌盛 題陸母王太君傳 題陸式文書譜 秋蘭和朱子韻

卷二七言古詩二十五首

壽劉紫升七十 壽石次卿五十 文宮銀杏歌 題周亦泉先生滄江漁隱圖 蘭僊歌贈蘭僊先生
題西林居士七十小影 中秋對月憶張斗航社長陸冠秋表兒用韓昌黎八月十日贈張功曹詩 蟋蟀行 哀武
昌 題鄭所南先生畫蘭冊 楊墓廟歌并序 訪陸孝廉鍾烈掃墓并序 題友人繪菜花圖 對酒
歌 倒戈行 龍爪槐 雪松 遊惠山觀第二泉 詠梅妃墓有序 贈王孝子志清詩和顧君公度
劉河鎮火 哀趙烈女 踏船行 拉夫行 題費氏先德徐氏節烈傳

卷三五言律詩二十七首

題樸花山館讀書圖 和杜工部對雪詩用原韻 冠秋表兄舉行甲子吟社第二次雅集約同張君斗
航錢君躬行李君又辛吳君野公蔣君平階章君賦瀏會飲於海甯寺公園勝友如雲暢談心曲南園風
雅於茲未墜謹次杜工部過何將軍山林韻成五律十首以誌雪泥即請諸社友指正 哀鴻 蝨蟹
懷甲子今止壯長斗航冠秋兩兄用杜工部春日懷李白韻 詠鄧尉山清奇古怪四柏四首 贈董東蘇 憶兄用杜

工部月夜
憶奎弟韻

懷施少農譜牒

詠梅花嶺二首

同柱尊泛舟蓉湖

遊無錫梅園

響展廊

卷四七言律詩六十四首

和孫伯護君羅溪訪友圖步原韻

對菊和唐若欽太先生

校外操場被燒感賦

書感

湘潭王王

秋君在尙賢堂演說孔教感而有作

校園內蛺蝶花盛開因憶昔年讀書護影廬時窗外曾徧植是花

今忽忽二十年撫今思昔悵然有感

虞美人并序二首

和守五有感原韻

春草四首用王漁洋秋柳韻

秋草四首用王漁洋秋柳韻

謁彭蘭階先生墓并序

題鄭所南先生畫蘭冊子

訪徐文定公墓二首

謁李

文忠公祠二首

訪梁鴻冢

和吳君耳似用原韻

耳似次前韻見贈後依韻答之

和枕山隱士夢

中詠竹原韻

和履恆表甥謁曹墓詩

聖誕行禮感賦

輓徐履坦

秋雨

將臺二首并序

祭詩

弔陳孝子用孝子詩刊時記有序

潘君振聲南匯風雅士也寓居滬南別墅編輯書報外以栽種花卉自娛頃

蒙贈黃薔薇及山茶兩盆珠玉見投瓊瑤莫報答詩兩章藉伸謝悃二首

太白酒樓

錢歲

有感二

律 贈徐震池

甲子中秋有感 贈王幼遴

秋海棠

大雪見避難者紛紛扶老挈幼齎簷下感而有作

越三日復大雪潰兵進駐虹橋難民踵至狀至狼狽愴疊前韻

元宵訪唐潤懷昆仲留飲賦贈

題顧伯圭嘉樹室二首

途次劉河劫餘灰燼滿目蒼涼愴然有作四首

中秋節有感 老少年

秋葵 雅陣 蓼花 鷓粟花

題聞樺香室詩文稿

山茶

謁彭蘭階先生墓

卷五七言絕詩八十一首

題黃伯鈞君南渡觀桃圖四首

夢蔚如姪在庭內玉蘭下贈紅豆一莢醒而不寐枕上感賦四首

甲

子元日七絕四首 夢與景周兄至京熾夫丈邀至致美齋小酌同往琉璃廠買舊書醒成四絕東景周
兄藉博一粲 題海鹽徐女史畫冊有序十二首 過曇陽觀遺址感賦八首 紅葉四首 武陵橋四
首 謁姜參政宅四首 西田懷古四首 夜宿劉河早起登新浮橋觀落潮二首 殘蟹 寒雅 題
兒童行樂圖二首 蠟梅四首 申江冶春詞四首 睡餘四首 六人坎四首有序 寓靜觀堂喜與蘭
孫譜弟同居 殘菊 早梅 秋楓二首 酒龍 再用自韻自嘲

養廬文稿目錄

卷一

李斯論 學顏子之所學論 韓昌黎以孔墨並稱太史公以孟荀合傳論 子罕言利與命與仁然易傳屢言命論語中言仁尤多義屬可疑說 晉束皙對武帝三日曲水之義曰周公成洛邑因流水以泛酒故逸詩云羽觴隨波論 孝有不及弟有不時說 墨子謂亂所自起起不相愛論

卷二

原匪 錢孝女贊 弔殷三仁文 擬屈子橘頌 藐姑射山神人傳 鳳簫玉笛兩生合傳 秋月篇 說鈞

卷三

古今大學錯簡肱訂序 國策編年讀本序代 國策小品序 王烟客先生集序 茹經堂文集序 閻齋經著序 龔安節先生文集序 中學國文讀本序 南洋大學新國文三集序 延陵夫子隨年紀略序 尊倉月刊序 陸君式文字譜序 嚶鳴集序 吳莽漢詞學初桃序 王雨三醫說序 技擊部紀念冊序 費氏先德序 唐君忍庵廿年追痛錄序 甲子吟社序

卷四

太倉養老院募捐啓 嚶求社紀念會啓

卷五

先考事略 先妣事略 王君慰農傳 周甥介藩傳 張烈婦傳 趙烈女傳 清淳安縣知縣夏君墓誌銘 錢公履繆行狀

卷六

唐太夫子八秩壽序 胡母顧太夫人六十壽序 祭唐封翁文 旅滬同鄉會公祭陸吉卿先生文 祭蔚如姪文 蔣氏子哀辭 夏母馬太夫人哀辭 安定俞女士哀辭

養廬詩稿卷一

太倉李聯珪頌韓著

五言古詩共十四首

柬沈知事希白

大兵掃邊餘鳥雀避鷹隼保赤心誠求幸哉逢賢尹吾邑夙凋弊棄嬰任其殞况又值干戈誰爲加憐愍
走也愧不敏茲事抱悲憫五載所經營一朝刼奪盡坐視呱呱者餒死良不忍呼號爲乞憐乃被衆嘲哂
沈侯恤民瘼一語遽慨允親往丐急賑捐金助艱窘斯臺復舊模以翼復以引隣媪抱兒來絡繹殷且軫
對坐喁喁喜兒有乳吮藹如仁人言惠澤永不泯媲美漢龔黃循良爲世準

輓陸禮南表兄

昔在丁酉歲選拔崇四術首場試經學君名列第一余忝附驥後奪席騁文筆當時太原師期望同切密
謂是吾門俊餘子何堪匹豈意比榜發朋足並連黜相顧各慨然倕得復倕失揭曉後又出一備拔榜余
名第一名君次之余
乃走京師王門思鼓瑟君發金匱書靈蘭啓芳帙閉戶勤蒐討醫門精法律契闊十二載宣南重促膝君
意頗蹇連慷慨譚捫蝨世方習泄沓坐使長才軼國步既淪胥買藥起廢疾南歸與君遇詔君富著述內
經箋靈素焚膏夜繼日英華銷沮多取材蘄落實殺青曾未竟賦鵬報君卒生抱磊落姿死永閉幽室憂
愁能傷人誰具金石質一病痛沈繇後顧悲屯室余母與君母姊妹次禮秩早歲作鮮民出入悵銜恤中
表敘親誼每見敦友昵懷舊淚如霰不覺情詞溢

謁白公講院

絃歌化武城文學啓蜀郡循吏出儒林古語良可信白公蒞吾婁綱紀時方紊下車立四禁有若迅雷震
大蠹伏法誅衆賢以次進德教旣宏敷諸生各矜奮度地禪林旁宣講稽古訓養正端始基致遠發初軔
掘衣延名師登堂儀嚴峻桴亭行剛方確菴智深潛條理協金聲助公木鐸振是以卬奚民情麻胥孟晉
思公永勿諼遺構新規燼距今二百年陽九丁厄運父老敦古風硜硜希令聞講學寂無人斯院頗密慎
我來瞻拜餘獲與宮牆近俯仰意蒼茫蓄義向誰訊

題畫丐丐畫圖

雲霞絢燦爛山水恣奇異仰視穹穹天俯矚搏搏地四海一畫圖萬象自位置畫丐亦何爲丐此天地祕
長嘯宇宙中踽踽身如寄嗜畫有奇癖甘與乞兒厠不學風雅士邊幅飾妍媚伸紙捷揮毫造化供遣使
人道丐爲卑君以畫爲戲盡丐天地祕四王相見避

阮籍嘯臺

晨登廣武原暮宿陳留邑落葉莽蒼蒼悲風號獵獵突兀見高臺層累如覆笠長嘯闐無人山谷恍應答
憑弔懷昔賢愁心鬱萬疊孺子竟成名窮途真欲泣世方劉項爭言難支許入丹唇振妙音敝屣眇六合
鳥獸爲哀鳴枯枝辭落葉龍戰血未乾馬槽禍已及逸氣迅揚颿眼白胸非狹澎湃忽奔壯圓靈通呼吸
踽涼衆莫知破悶此登陟可憐嵇叔夜騏驎受維繫往從蘇門遊孫登拒不納浮沈典午朝雲臺覲建業
鄰笛聲悠揚臨刑幽憤集

題賈島除夕祭詩圖

浪仙奇男子冰雪縷魂魄蕭然事苦吟推敲忘悲戚斗轉歲云除狂歌出金石檢點錦囊中點點心血滴
無益費精神黃金虛牝擲棄置復可惜冥搜珍弋獲人生各有志義輪疾過隙何物守錢奴競相阿堵積
名山千古事不數雲臺蹟奇書載五車寒家徒四壁羅列陳几筵破紙發秀色君看長江集中有風濤激
鳴呼送窮窮不去乞巧巧難得辛苦立修名壽世永無極展圖景昔賢異代印心跡豪情凌九州壯志挾
四域懷古一慷慨相對意脈脈羣雅將散林歸鳥已喧櫪吾亦祭吾詩譚譚永今夕

嬰堂作蘇軍司令部乳母散去死存三孩感作

葛藟綏縣縣衆蔓相引牽人命不如草拋置在河邊河邊多蓼楚隱隱聞哭語垂死莫肯顧狂奔各首鼠
我欲挈之還隻手挾泰山躅躅不敢前於邑淚暗漣乘間反故鄉竄伏避强暴喜與至戚逢亂事競警告
謂言接嬰所已作講武堂黃口久失乳存者半瘡疔入夜鎗聲緊按戶事搜逐入門敢違居風餐復露宿
逃去避鄰鎮哀鴻嗟何多破廟棲老弱宛轉涕滂沱吾生丁不辰值此亂離世大厦勢已傾一木力至細
今晨長鬣至一擔肩三孩堂中僅存三孩伯衡飭人送鶴鎖嬰堂十中不一存子遺真可哀軍閥造殺運惡貫禍滿盈稽首

祝慈雲破巢幸完卵

衣垢待澣內人爲製新裳悵然有作

葛履可履霜纖手可縫裳縫裳裳已成惻惻心悲傷鷓鴣毀我室綢繆輸未雨虎口脫餘生飽經亂離苦
昨聞風鶴警雄兵從西來挺身各逃命露宿劇可哀轉瞬堅冰至大地陰凝凍無褐又無衣蕭蕭瞽羣衆

况又病絕糧四顧意旁皇親戚忍相棄飯顆無由嘗浩劫徧九州踏破杜陵韞我生何足道一貧任徹骨
觀岳鎮耶穌教堂施粥

咽咽復咽咽饑民當路泣鳩形並鵠面席地相雜選賴有慈善家施粥周困乏扶老攜幼來饑久氣喘急
果腹沾瓊漿粲粲儲玉粒草露命暫延深恩感普浹井田半蕭條富鄰眇義俠反倡景教徒行仁如不及
登堂一周察愧奮心嗚悵平生胞與懷至此無良法坐視轉溝壑流離誰安輯東南望故里裹足敢輕入
慘聞兩老婦流涕隨問答有子被擄去性命在呼吸一飽忍終宵疲極心更怯盍不歸去來豺狼尙在邑
岳鎮南廟設廠施粥誌盛

曠野集虎兕磨牙耽耽視呼號各狂奔蹙蹙靡所止扶持老與弱顛沛誠莫比終日荆棘中蒙袂呼庚癸
我亦連亂離見之淚如泚自顧囊橐空無力可振此中夜心徬徨展轉獨臥起念此溝中人安得有生理
鴻雁東南來尺書抵仁里遙允助麥舟加惠及桑梓伸紙再三讀雀躍增狂喜奔走約同人互爲手臂使
莫更緩須臾坐致民餒死設廠南廟中行潦洞酌彼饑者易爲食濟濟如歸市鳩形淚洗面垂涕歌樂只
人生有緩急奚忍相我爾勸告諸執事清白各自矢四郊方多壘禍亂在尺咫行道庶有福作善可獲祉
願發大慈悲博濟自今始

題陸母王太君傳

憶昔遊城南佳氣郊原扇維時適寒食亂落桃花片行行重行行春薦謁享殿吾友陸士衡肅客進深院
爲言此先祠吾父所營繕吾父早歲孤顛沛逢國變滿天蝗亂飛匝地龜坼遍野草無寸青腸飢淚下嚙

有母缺尸褻涕泣垂如線可憐傷哉貧菽水斷麥麵黃巾西南來憂心更激箭倉猝事逃亡負母肩頻顛
四野煽妖氛隆冬忽雷電中宵侍母起扶持心兢戰幸託神靈佑鮮民邀天眷輾轉四五年明時重清宴
劍戟銷光芒天日得重見橐筆到蘇閭仰被軍門薦清慎著勤勞考績膺上選置田一頃餘烏養供式醺
風摧慈竹頽寸草春暉戀回首痛紅羊寒泉淒泐遺命置義莊睦婣資引援焯焯綸綍音旌表來鄉縣
旨曰建坊可帝命速郵傳是祠方落成春秋供祭奠冊載柏舟節一篇中壘傳有煒貽彤管徵題遍黃絹
子亦能文章磊落軼時彥請爲題數行翰墨流藻綯予時謝不敏罄譚坐忘倦節孝古所欽皎潔踰雪練
況復遘亂離精金歷百鍊我無倚馬才那敢污行卷斯語越十載故人封幽毳淒涼宿草生念舊日一眴
觸我匪莪感反袂欲掩面今秋過胥門仙翁謁曼倩與余促膝語娓娓霏瓊霰追述母氏恩九京痛長暝
手示片奏案命我篆壁瑗主臣不獲辭握管謬論譔昔讀范莊記公輔宏文擅走也愧不才瑣義雜挽牽
宿諾踐良朋俚歌當村諺

題陸式文書譜

昔有壽陵子辭燕至邯鄲喜新競厭故翻訝學步難世人尙歐化墨妙輕文翰狂瀾日倒瀉國粹久摧殘
璋璽曾莫辨帝虎誰細刊陸君獨崛起懷古喟然歎謂昔造字初三聖各心殫中土師倉頡下行姿態寬
依盧左行轉梵向右行盤濫觴出一源同文蔚大觀研精編六書傳鈔口口官海內不脛走珍重遍詞壇
近復出緒餘八法縈蟠瀾殺青鏤不合屈玉去瑕癥鋟板惠學子脫粟受金丹凡骨一朝化灑落舞彩鸞
君家有太翁換鵝心懌歡開卷述庭訓列眉衆議攢始信家學富如僚弄彈丸鴻都紙競貴易縑爭傳看

心畫書之本雄肆戒枯乾笑彼革履者夏蟲難語寒倒薤愧下走烏絲撫闌干詩成適秋至垂露潤團團

秋蘭和朱子韻

秋蘭生空谷養晦闕重襟夔絕人間世渺渺含素心當門世方忌投老在山林知音有霜傑未許俗客尋

其二

寒風振百草霜露日以滋蕭艾自零落荆棘誰能治湘纍不可作悄然動幽思願言贈子佩終古同心期